



UPA2020 tikitsinnagu uangut politikerit mingutsitsinnginnerunissamut silallu pissusaanik allanngortitsinnginnerusussanik iliuusissatsinnut innersuussisussamik suleqatigiisitamik immikkut ilisimasalinnik inuttalimmik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Innersuussinerit tamarmik immikkut imaqassapput aningaasatigut kingunerusussanik inuiaqatigiinnut aamma innuttaasunut/sullivinnut.

(Inatsisartunut ilaasortaq Steen Lyngø, Demokraatit)

(Siullermeerneqarnera)

Silap pissusaata allanngoriartornera inunniit piliaasoq amerlanerniit ilisimaarineqarpoq. Ilisimatusartut ilisimatuullu nuimnersaat aamma isumaqarput silap pissusaata allanngoriartornera inuit piliarigaat.

Kikkut tamarmik paasilersimassavaat kinguaariit tulliuuttut silap pissusaata allanngoriartornerata nassataanut ajornartorsiutinut eqqummaarittorujussuusut. Meeqqat inuusuttullu nunarsuup sinnerani sumiiffippassuarni akerliussutsimik takutitseqattaarput iliuuseqaqqusillutik. Aamma nunatsinni taamatut pisoqarpoq meeqqat inuusuttullu aqqusinermi angalaarlutik akerliussutsimik takutitsimmata marsip ulluisa 19-anni inersimasunut paaseqqullugu imaannaanngitsoq aqqusaaleripput. Taakku inuusuttunnguit qutsavigerusuppakka. Meeqqat inuusuttullu nipaap pingaarluinnaqqissaartuuvoq tamatsinnut eqqarsalertitisarmata.

Inatsisartunut ilaasortap Steen Lyngø Demokraatineersup siunnersuuteqarnermigut silap pissutaasa allanngorneranut atatillugu ajornartorsiutit pinngortartut saqqummiuppai tamannalu pillugu qutsavigerusuppara. Pingaaruteqarpoq Inatsisartunit takutissallugu silap pissusaata allanngoriartorneranut akiutissalluta piareersimasugut aammattaq iliuuseqarnissatsinnut piareersimasut. Meeqqat inuusuttullu akerliussutsimik takutitsisut tapersersortariaqarpagut taakuummata uagutsinniit tiguisissat ingerlatitseqqittussallu.

Suleqataasariaqarpugut akisussaataqaanerpullu takutillugu anguniarlugu nunarsuatta inuuffigalugu peqqinnarnerunissaa, toqqissisimanarnerunissaa aammalu piujuaannartitsineq tunngavigalugu inuuffiginissaa. Ujartorneqarput iliuusissat pisariitsunnguit soorlu angerlarsimaffitsinni pinngortitamilu akisussaassuseqarluta pinissarput. Naalagaaffiit Peqatigiit nunarsuaq sinnerlugu anguniagaasa 17-t tunngavigalugu iluaqutaasinnaasunik politikkikkut eqqarsalereerpugut. Nalunngilara kommunini sumiiffiit ilaanni iluaqutaasinnaasunik piviusunngortitsisoqareersoq - aamma upperaara nuna tamakkerlugu politikernitsinni itinerusumik eqqarsarinnaajumaartugut. Demokraatini isumaqarpugut nunarsuarmioqatigiit oqallinneranni akulluarsinnaasugut naak Parisimi isumaqatigiissummut atsiqataanikuunngikkaluarluta. Silap pissusaa iluaquserniarlugu iliuuseqarsinnaavugut iliuuseqartariaqarlutalu. Uagut Issittumi inuusugut taakkuuvugut ulorianartorsiortinneqarnerpaanut ilaasut



aammalu allanngoriartornerit misigereerpagut, taamaattumik soqutiginnilluta suleqataasariaqarpugut. Taamaattumillu pingaartorujussuuvoq iliuuserisinnaasatsinnik iliuuseqarnissarput aammalu suleqatigiisitamik nunarsuatsini ilisimatusartunik immikkullu ilisimasalinnik inuttalimmik suleqatigiisitaliortoqarnissaanut isuma pingaarluinnartutut isigaarput. Kissaatiginngilarput suliniutit suliallu aallartinneqarsimasut unitsinneqarnissaat, kissaatigaarpulli suliniutit ingerlareersut saniatigut immikkut ilisimasallit suliamik ingerlatsissasut. Taamaaliornikkut siunnersuutitsialannik pissarsisinnaassaagut allat suliniutit pingarutillit ingerlasut unitsinngikkaluarlugit.

Siunnersuut tapersorsorluinnarparput siunertaallu aamma ingerlateqqikkusupparput Avatangiisinut Ataatsimiititaliamut.